



明會要卷十三

永新龍

文彬纂

禮八嘉禮

上尊號徽號

吳元年十二月癸丑相國李善長等奉表勸進帝曰始吾
卽王位不得已勉從眾言今卿等復勸卽帝位恐德薄不
足當之羣臣固請上固卻之明日善長等復請曰殿下謙
讓之德著於四方感於神明願爲生民計早徇羣臣之請
上曰中原未平軍旅未息吾意天下大定然後議此而卿
等屢請不已此大事須詳酌禮儀而行

明會要卷十三

一

洪武元年正月乙亥昭告上帝皇祇追尊四代祖考妣爲
皇帝皇后奉上玉寶玉册册曰祖父有天下傳之子孫子
孫有天下追尊祖考此古今之通義也某遇天下兵起躬
擐甲胄戡定四方以安人民土地日廣皆祖考深仁厚德
所致也諸臣庶推尊爲皇帝先世考妣未致尊崇謹上皇
帝皇后尊號已上大訓記

天子登極奉母后或母妃爲皇太后則上尊號其後或以
慶典推崇皇太后則加二字或四字爲徽號上徽號致詞
而上尊號則止進册寶會典

上皇太后尊號自宣宗登極始禮志

英宗復辟岷王徽燦請上皇太后尊號禮部以非本朝故事乃止已而尙寶司少卿錢溥謂陳汝言曰復辟之初非奉太后詔誰敢提兵入禁今論功行賞無虛日而母后徽號未加甯非闕典汝言以聞帝大悅及問李賢曰此莫大之孝也遂上尊號曰聖烈慈壽皇太后明代宮闈徽號自此始

三編

憲宗卽位議上兩宮徽號中官夏時欲獨尊貴妃爲太后李賢彭時持不可頃之中官傅貴妃旨曰子爲皇帝母爲皇太后豈有無子而稱太后者宣德間有故事彭時曰今日事與宣德異胡后上表讓位故正統初不加尊今名分

明會要卷十三

二

固在安得爲比中官曰如是何不草讓表時曰先帝時未嘗行今誰敢草中官復厲聲枕之時拱手面天曰太祖太宗神靈在上誰敢二心錢后無子何所規利而爲之爭不忍默者欲全主上聖德耳若推大孝之心則兩宮並尊爲宜賢亦極言之議遂定將上冊寶彭時曰兩宮同稱則無別錢皇后請加二字以便稱謂從之

彭時傳

嘉靖十五年十二月甲寅兩宮皇太后徽號增至八字皇太后張氏加上昭聖恭安康惠慈壽皇太后蔣氏加上章

聖慈仁康靜貞壽

大政記

神宗卽位上兩宮尊號舊制天子立尊皇后爲皇太后若

有生母稱太后者則加徽號以別之馮保欲媚貴妃因以並尊風張居正下廷臣議尊陳皇后曰仁聖皇太后生母貴妃李氏曰慈聖皇太后始無別矣

后妃傳

冊封皇子

洪武三年二月考定諸王冊封禮儀寶制四月辛酉以封建告太廟宴羣臣於奉天殿及文華殿帝諭廷臣曰元失其馭羣雄並起四方鼎沸民遭塗炭朕躬率師旅以靖大難皇天眷佑海宇甯謐然天下之大必樹藩屏上衛國家下安生民今諸子旣長宜各有爵分鎮諸國朕非私其子乃遵古先哲王之制爲久安長治之計羣臣對曰陛下封

明會要卷十三

三

建諸王以衛宗社天下萬世之公議帝曰先王封建所以庇民周行之而久遠秦廢之而速亡漢晉以來莫不皆然其間治亂不齊特顧施爲何如耳

乙亥冊封諸皇子爲王詔天下曰朕惟帝王之子居嫡長者必正儲位其諸子當封以王爵分茅胙土以藩屏國家朕今有子十人卽位之初已立長子標爲皇太子諸王之封本待報賞功臣之後然尊卑之分所宜早定乃以四月七日封子棖爲秦王櫜爲晉王棣爲燕王櫛爲吳王楨爲楚王榑爲齊王梓爲潭王杞爲趙王檀爲魯王從孫守謙爲靖江王皆授以冊寶置相傅官屬

册秦王文曰昔君天下者必建屏翰然居位受福國於一方並簡在帝心第二子棧今命爾爲秦王永鎮關中豈易事哉朕起農民與羣雄並驅艱苦百端志在奉天地享神祇張皇師旅伐罪弔民時刻弗怠以成大業今爾有國當恪敬守禮祀其宗社山川謹兵衛恤下民必盡其道體朕訓言尙其慎之

諸王文同

册靖江王文曰朕稽古帝王撫有方夏必茂建親支所以敦族固本其來尙矣朕旣爲天子追念吾兄以爾守謙兄之孫也俾王靖江以鎮廣海之域毋忘訓語益脩厥身尙

其慎哉

已上大訓記

明會要卷十三

四

二十八年八月更定皇太子親王等封爵册寶之制皇太子親王俱授金册金寶皇太子妃王妃公主授金册不用寶

大政記

成化末封岐益衛衡雍五王帝親告奉先殿遣使就各王府册之罷臨軒禮諸王當襲封者俱於歲終遣官册封嘉靖中改於孟春著爲令

通典

崇禎十四年九月辛卯封皇子慈炯爲王先是上諭禮臣曰朕第三子慈炯年已十齡敬遵祖制宜加王號但旣受册封必具冕服而會典開載年二十五始行冠禮十齡受封加冠二禮並行可乎於是禮臣歷考典故參稽經傳

以奏乃册封爲定王仍俟至十二歲始行冠禮

諸王傳

行幸

洪武元年四月甲子車駕發京師幸汴梁五月庚寅至汴

梁辛卯改汴梁曰開封府六月壬寅躬祀開封府諸神仍

遣官祭境內山川

大政記

八月己巳詔以應天爲南京開封爲北京壬午幸北京

本紀

二年九月癸卯詔以臨濠爲中都

大政記

四年二月甲戌幸

中都

本紀

五年定出巡儀注車駕出入有司肅清道路官民不許開

門觀望行立所在官員父母合迎駕者於仗外路右叩頭

明皇卷十三

五

俯伏候車駕前行方起若遇駐蹕之處合迎駕之人行五

拜禮

王圻通考

八年四月辛卯幸中都

本紀

永樂六年八月丙戌詔曰成周營洛肇啟二都有虞勤民

尤重巡省朕君臨天下統御之初已升北平爲北京今國

家無事省方維時將以明年二月巡幸北京命皇太子監

國親王止離王城一程迎候官吏軍民於境內朝見非經

過之處毋得出境凡道途供應皆已節備有司不得有所

進獻尋命禮部頒巡狩禮並行直省凡有重事及四夷來

朝與進表者俱達行在所小事達京師啟皇太子奏聞

實錄

是年改定巡狩儀車駕將發奏告天地社稷太廟孝陵祭
大江旗纛等神軼祭於承天門將至北京境上設壇祭北
京山川等神車駕至北京奏告天地祭境內山川王圻通考

八年七月壬午至北京
十一年二月甲子幸北京

十五年三月壬子北巡

宣德五年九月乙卯巡近郊己未還宮十月丙子巡近郊
至洗馬林遍閱城堡兵備已上本紀

六年七月帝微行漏下十二刻帝從四騎幸楊士奇宅士
奇倉皇出迎頓首曰陛下奈何以宗廟社稷之身自輕帝

明實錄卷十二

六

曰朕思卿一言故來耳越數日帝遣內官問士奇微行有
何不可對曰陛下尊居九重幽隱豈能遍洽萬一冤夫怨
卒窺間竊發誠不可不慮後旬餘獲二盜如士奇言帝曰
今而知卿之愛朕也三編

九年九月上率師巡邊癸未車駕發京師庚子回鑾王圻通考
正統十三年十月幸大興隆寺二編

天順三年十月己未幸南海子
四年十月戊辰幸南海子已上本紀

正德九年二月庚子帝始微行王圻通考

十二年七月帝聽江彬言將出關幸宣府巡關御史張欽

上疏諫曰比者人言紛紛謂車駕欲度居庸遠遊邊塞臣度陛下非慢遊蓋欲親征北寇也不知北寇猖獗但可遣將徂征豈宜親勞萬乘英宗不聽大臣言六師遠駕遂成己已之變夫匹夫猶不自輕奈何以宗廟社稷之身蹈不測之險况今內無儲貳國家多事甘肅有吐蕃之患江右有葦賊之擾淮南有漕運之艱巴蜀有採辦之用京畿諸郡夏麥少收秋潦爲沴而陛下不虞禍變欲縱轡長驅觀兵絕塞臣竊危之已聞朝廷切諫皆不納復疏言臣愚以爲乘輿不可出者有三人搖動供億浩繁一也遠涉險阻二宮懸念二也北寇方張難與之角三也臣職居言路

奉詔巡關分當效死不敢愛死以負陛下疏入不報八月朔帝微行至昌平傳報出關甚急欽命指揮孫璽閉關納門鑰藏之分守中官劉嵩欲詣昌平朝謁欽止之曰車駕將出關是我與君今日生死之會也關不開車駕不得出違天子命當死關開車駕得出天下事不可知萬一有如土木我與君亦死甯坐不開關死死且不朽頃之帝召璽璽曰御史在臣不敢擅離乃更召嵩嵩謂欽曰吾主上家奴也敢不赴欽因負敕印手劍坐關門下曰敢言開關者斬夜草疏曰臣聞天子將有親征之事必先期下詔廷臣集議其行也六軍翼衛百官扈征而後有車馬之音羽旄

之美今寂然一不聞輒云車駕卽日過關此必有假陛下
名出邊句賊者臣請捕其人明正典刑若陛下果欲出關
必兩宮用寶臣乃敢開不然萬死不奉詔奏未達使者復
來欽拔劍叱之曰此詐也使者懼而返爲帝言張御史幾
殺臣帝大怒顧錢甯爲我趣捕殺御史會梁儲蔣冕等追
至沙河請帝歸京師帝徘徊未決而欽疏亦至廷臣又多
諫者帝不得已乃自昌平還意怏怏未已又二十餘日欽
巡白羊口帝微服自德勝門出夜宿羊房民舍遂疾馳出
關數問御史安在欽聞追之已不及欲再疏諫而帝使中
官谷大用守關禁毋得出一人欽感憤西望痛哭於是京

明會要卷十三

八

師傳張御史閉關三疏云

張欽傳

十三年正月丙午至自宣府命羣臣具綵帳羊酒郊迎御
帳殿受賀辛酉復如宣府

本紀

七月丙午復如宣府工科都給事中石天柱念帝盤遊無
度羣臣雖諫帝意不回思所以感動之者乃刺血草疏略
曰臣竊自念生臣之身者臣之親也成臣之身者累朝之
恩也感成身之恩欲報之於陛下者臣之心也因刺臣血
以寫臣心明臣愚忠冀陛下憐察數年以來星變地震大
水奇荒災異不可勝數而陛下不悟禍延太皇太后天之
意欲陛下居衰絰中悔過自新以保大業也倘或不悟天

意或幾乎息矣夫大位者奸之窺也昔太康田於洛汭煬帝行幸江都皆以致敗可不鑑哉方今朝廷空邊鄙空城市空倉廩空天下皆知危亡之禍獨陛下不知耳治亂安危在此行止此臣所痛心爲陛下惜復昧死爲陛下言也凡數干言當天柱刺血時恐爲家人所阻避居密室雖妻子不知旣上卽易服待罪聞者皆感愴而帝不悟也

石天柱傳

十四年二月壬申至自宣府

本紀

是年三月帝議南巡修撰舒芬等上疏極諫曰古帝王所以巡狩者協律度同量衡訪遺老問疾苦黜陟幽明式序在位是以諸侯畏焉百姓安焉若陛下之出不過如秦皇

明皇卷十一

九

漢武侈心爲樂而已非能行巡狩之禮者也博浪柏谷其禍亦可鑒矣近者西北再巡六師不攝四民告病哀痛之聲上徹蒼昊傳播四方人心震動故一聞南巡詔書皆鳥驚獸散而有司方以奉迎爲名徵發嚴急江淮之間蕭然煩費萬一不逞之徒乘勢倡亂爲禍非細且陛下以鎮國公自命苟至親王國境或據勳臣之禮以待陛下將北向朝之乎抑南面受其朝乎假令循名責實深求悖謬之端則左右寵倖無死所矣尙有事堪痛哭不忍言者宗藩蓄劉濞之釁大臣懷馮道之心以祿位爲故物以朝署爲市廛以陛下爲弈棋以革除年間爲故事特左右寵倖知術

短淺無能以此言告陛下耳使陛下得聞此言雖禁門之

外亦將警蹕而出尙敢輕騎慢遊哉舒芬傳

八月癸未車駕發京師十二月丙戌至南京本紀江彬又欲

導帝幸蘇州下浙江抵湖湘諸臣極諫會其黨亦勸阻乃

止三編

嘉靖十六年三月癸酉如天壽山丙午幸大峪山

十八年二月乙卯幸承天辛酉次眞定望於北嶽三月己

巳渡河祭大河之神辛未次鈞州望於中嶽四月壬子至

自承天甲子幸大峪山已上本紀

隆慶二年二月丙子幸南海子先是左右有言南海子之

明會要卷十三

十

勝者上將往幸都給事中王治率同官諫內閣徐階尙書

楊博等並阻止皆不聽至則荒莽沮溼上甚悔之王治傳

視學

洪武五年京師文廟成車駕幸大學行釋奠禮春明夢餘錄時以應

天府學爲國子學蓋在應天府學行禮至十五年別立國子監成太祖復於國子監行釋奠禮

十五年五月己未國子學新成帝將行釋菜禮侍臣有言

孔子雖聖人臣也禮宜一奠再拜帝曰昔周太祖如孔子

廟左右謂不宜拜周太祖曰孔子百世帝王師何敢不拜

今朕有天下敬禮百神於先師禮宜加崇乃命禮部尙書

劉仲質詳議仲質請帝服皮弁執圭詣先師位前再拜獻

爵又再拜退易服乃詣彝倫堂命講庶典禮隆重詔曰可
劉仲質傳

永樂四年三月辛卯朔帝詣國子監禮部尙書鄭賜引宋制請服鞞袍再拜帝不從仍服皮弁行四拜禮御彝倫堂授經設几榻賜講官及大臣翰林坐祭酒司業博士助教序進坐講諸生環列以聽

禮志三編

正統九年二月大學成三月辛亥朔幸大學釋奠先師祭酒李時勉當進講會久病及升堂講尙書詞旨清朗上悅賜予有加

本紀及時勉傳

成化元年三月丁巳帝視大學釋奠先師始加牲用樂停

明會要卷十三

十一

祭酒官以下宴止宴衍聖公三氏子孫於禮部

宏治元年三月癸酉幸大學先期致齋一日奠加幣牲用

太牢收分獻爲分奠尙書王恕請之也

已上史概

嘉靖十二年三月丙辰上以先師祀典旣正再視學命大

臣致奠啟聖公祠

禮志

隆慶元年八月癸未朔釋奠於先師孔子

本紀

天啟五年三月甲寅釋奠於先師孔子

本紀

已聽祭酒講又議裁諸聽講大臣賜坐茶禮吏部尙書崔

景榮力持不可乃止

景榮傳

崇禎十四年八月行釋奠禮禮部先以八月初四請已報

可是日丁未舊例丁祭遣閣臣行禮乃改是月十八日躬
行釋奠而初四日仍遣閣臣行禮春明夢餘錄
十七年二月釋奠遣大學士魏藻德行禮是日天氣晴明
臨祭各官甫就拜位大風忽起殿上燈燭盡滅庭下松檜
作怒號聲黃沙如雨下竟不能成禮而罷同上

明會要卷十四

永新龍文彬纂

禮九嘉禮

經筵日講

洪武三年二月上御東閣學士宋濂待制王禕講大學

十六年八月上御謹身殿命東閣大學士吳沈等進講周

書立政

十八年九月上御華蓋殿大學士朱善以周易進講已上禮

通考

洪武中令儒臣更番入禁中每日輪一員進講侍直誤者

明會要卷十四

罪之如大學士吳沈嘗坐進講遲誤被劾殿閣詞林記

永樂二年六月朔御文華殿大學士楊士奇以大學講義

進上覽其文善之遂命翰林春坊諸臣分撰諸經講義與

閣臣再閱有未當處悉與改正然後呈講

宣德二年二月己酉御文華殿召翰林進講離婁篇三年

二月進講舜典因命左右出茶茗以賜講官已上五禮通考

宣德以前儒臣進講無定日亦無定所正統元年三月楊

士奇楊榮楊溥請開經筵並擇老成識達大體者數人以

供侍講之職太皇太后然之命士奇榮溥及侍講學士王

直等爲經筵官以月之二日十二日二十二日會講文華

殿餘日仍令講讀官四人入講經史

三編

正統初選經筵官閣臣悉以翰林院官充選時章后在內批云如何不見居外賢良以旨付宏文館於是劉球諸人

自部屬進次經筵

陸鈺病逸漫記

景泰元年二月癸未初開經筵上每臨講幄輒命宦官擲金錢於地任講官遍拾之號恩典文臣與者內閣高穀等外惟儀銘俞山俞綱蕭鎡趙琬數人而已

儀銘傳

八月御經筵先是御史許仕達上言經筵之講一暴十寒聖學何以有成正統間上下蒙蔽無敢言者願陛下於經筵之外日召儒臣講論經史稽之於古驗之於今以應無

明會要卷十四

二

方之變優詔褒答

實錄

故事勳臣不知經筵閣臣俱同知經筵至李賢以首輔與勳臣俱知經筵遂以爲例

春明夢餘錄

成化五年八月復御經筵先是劉定之請經筵兼講太祖御製諸書斥異端邪教勿令害政耗財上留其疏至是乃

詔行之

憲章錄

宏治元年三月吏部侍郎楊守陳請遵祖制開大小經筵略言大經筵但如舊制若小經筵當擇端介博雅之臣以次進講凡前朝典籍祖宗謨訓百官章奏皆當貯文華後殿退朝披覽日令內閣一人講官二人居前殿右廂有疑

輒問一日間居文華殿之時多處乾清宮之時少則欲寡
心清臨政不惑而出治之本立矣帝遂於月之丙子開經
筵翼日丁丑命儒臣進講楊守陳傳

七月文華殿日講畢賜講官程敏政等各織金緋衣金帶
上皆呼先生而不名王圻通考

諭德王華在講幄最久孝宗甚眷之李廣貴幸華講大學
衍義至唐李輔國與張后表裏用事指陳甚切帝命中官

賜食勞焉王守仁傳

五年二月定經筵俱用吉服大政記

十年三月有詔以下旬御經筵給事中楊廉言故事經筵

明會要卷十四

三

一月三舉苟以月終起以月初罷則進講有幾且經筵起
而後日講繼之今遲一日之經筵即較一日之日講也報

閻儒林楊廉傳

侍講學士王鏊充講官中貴李廣導帝遊西苑鏊講文王
不敢盤于遊田反覆規切帝爲動容講罷謂廣曰講官指

若曹耳王鏊傳

十八年二月上御經筵學士張元禎請講太極圖西銘等
書上觀之喜曰天生斯人以開朕也元禎長不逾中人每

日講上特設低几聽之元禎傳

正德元年三月丁亥大學士劉健等言自開講以來不時

傳旨暫免者多以兩宮朝謁爲詞近又云擇日乘馬臣等愚見以爲乘馬等事似與講學兩不相妨至於慈宮問安往來不過頃刻且兩宮以宗社爲念見皇上勤於講學亦必喜動顏色今以頃刻之間安而廢一日之學業恐非所以慰聖顏承慈意也伏乞日勤聽講除舊例假日外其餘尋常之日不暫停免使臣等得以少效涓埃則聖德日隆聖治日新矣報可

九月戊寅上御經筵先是經筵既開以暑月停免至八月劉健等以爲請時上方大婚命俟九月至是司禮監復傳旨欲免午講健等以先帝故事日再進講伏乞聖明少留數刻使臣等照舊每日二次進講庶幾盡保傅之責以免

曠職之愆

已上實錄

二年三月上御經筵詹事楊廷和學士劉忠直講講畢因致規諫語上退語劉瑾曰經筵講書耳何添出許多話來瑾曰二人可令南京去於是並遷南侍郎

昭代典則

嘉靖元年五月命經筵輟講林俊舉祖宗勤學故事以諫

不聽

林俊傳

六月丁丑大學士楊廷和等上言近以暑日傳旨經筵日講俱暫免又免午奏臣等職司輔導實有未安伏乞宮中無事不廢讀書其大學尙書容臣等接續前日所講讀者

量進起止仍不時御文華殿召見臣等俯賜訪問上是之
已而編修湛若水亦以爲言俱報聞

實錄

六年六月上諭講官日輪一員將經書通鑑撮其有關君
德者直錄其義以進楊一清言經書淵微通鑑浩繁請日
講大學衍義從之

通紀

是月定講大學衍義儀每月初三初八十三八日用經
筵講官二員進講內閣學士一員侍班講畢賜茶酒飯俱

如日講儀

五禮通考

經筵講官及執事官失儀舊制許令出班請罪得面宥世
宗以經筵乃講學親賢之地一切差誤令侍儀科道退而

明會要卷十四

五

具奏免其自請

春明夢餘錄

八年三月上御經筵國子祭酒陸深進講言經筵講章必
送內閣裁定是其意盡出閣臣講官不過口宣之耳此於
大義未安而感孚之道亦甚相遠請容臣等各陳所見因
以觀臣等之深淺更請自訓詁衍釋之外凡天下政事與
章得依經比義條列陳奏以裨聖學上以深欺罔詔降一

級謫延平同知

通紀

十年定無逸殿講儀

五禮通考

十二年五月召講官廖道南進講論語高宗諒陰節吏部
尙書汪鏞求大學士張孚敬改題以其有君薨聽於冢宰

句道南執不肯孚敬遂具揭帖以進上批云前日徐縉講孟敬子章撤去二節人之將死不講夫死生人道之常何諱之有如卿等言則忠讜之論何由得聞還命道南照舊

進講

王圻通考

隆慶六年定每日早講畢帝進煖閣少憩閱章奏閣臣等退西廂房久之率講官再進午講講通鑑節要及貞觀政要講畢帝還宮凡三六九視朝日暫免講讀

禮志

神宗卽位張居正請定三六九日視朝餘日御文華殿講讀

二編

萬厯初御經筵畢覽貞觀政要曰唐太宗多有慚德魏徵

明會要卷十四

六

大節有虧命以後講禮記其貞觀政要停講

春明夢餘錄

二年十二月講讀畢問張居正元夕鼇山烟火祖制乎對曰非也成化間以奉母后當時諫者不獨言官卽翰林亦有三四人上疏糜費無益所當節損上曰然明年元夕罷

烟火鼇山

同上

是年定經筵春講以二月十二日起至五月初二日止秋講以八月十二日起至十月初二日止

禮志

六年十二月甲辰張居正以聖學方新經筵日講遠稽古訓不若近事之可徵上溯先王不若家法之易守乃屬儒臣將太祖列聖實錄寶訓分類編輯以經筵日進講上嘉

納之春明夢餘錄

十五年二月罷日講申時行請免日講仍進講章以備觀覽自後爲故事講筵遂永罷申時行傳

熹宗初御講筵內閣戒講官宜簡要講畢勿多獻孫承宗曰主上幼冲正宜詳明切直博引曲譬若講官聽中堂爲芟改中堂又視中官爲忌諱則講筵爲無人矣講官李光元亦言講章不宜芟改上書爭之春明夢餘錄

天啟二年十月文震孟上勤政講學疏略言經筵日講臨御有期學非不講然侍臣進講鋪敘文辭如蒙師誦說已耳祖宗之朝君臣相對如家人父子咨訪軍國重務閭閻

明會要卷十四

七

隱微情形畢照奸詐無所藏左右近習亦無緣蒙蔽若僅尊嚴如神上下拱手經傳典謨徒習故事安取此正笏垂紳展書簪筆者爲震孟傳

時有詔停經筵日講給事中周朝瑞等言此果出聖意輔臣當引爭如輔臣阿中涓意則其過滋大且主上冲齡志意未定獨賴朝講不輟諸臣得一覲天顏共目指鹿之奸今常朝已漸傳免儻併講筵廢之九闈既隔無謁見時司馬門之報格不入呂大防之貶不及知國家大事去矣會禮部亦以爲言乃命日講如故朝瑞傳

崇禎元年文震孟官中允充日講官在講筵最嚴正時大

臣數逮繫震孟講魯論君使臣以禮一章反覆規諷帝卽降旨出尙書喬允升侍郎胡世賞於獄帝嘗足加於膝適講五子之歌至爲人上者奈何不敬以目視帝足帝卽袖掩之徐爲引下時稱眞講官

震孟傳

三年日講官羅喻義呈講章於政府溫體仁令改不從體仁怒上言故例唯經筵進規多於正講日講則講多規少今喻義以日講用經筵之例令刪改不從乃下吏部議喻義奏辯曰講官於正文外旁及時事亦舊制也臣展轉敷陳冀少有裨益體仁刪去臣誠恐愚忠不獲上達致忤輔臣今橐草具在望聖明省覽部議革職閒住

喻義傳

明會要卷十四

八

十五年倪元璐以大司農充講官講生財有大道一節極言加派聚斂之害上震怒謂邊餉匱乏部中未見有長策徒作此皮面語元璐徐曰臣儒者所陳雖是書生語然不敢懷利以事君上默然次日謂閣臣曰講筵有問難而無詰責昨日之意朕甚悔之

春明夢餘錄

東宮出閣講學

洪武元年十月建大本堂命魏觀侍太子說書及授諸王經又選國子生國琦王璞張傑等十餘人侍太子讀書禁中琦等入對謹身殿帝謂殿中侍御史郭淵文等曰諸生於文藝習矣然與太子處當端其心術不流浮靡

明紀

初太祖命學士宋濂授皇太子諸王經於大本堂後於文
華後殿世宗改爲便殿遂移殿東廂

禮志

濂傳太子先後十餘年凡一言動皆以禮法諷勸使歸於
道至有關政教及前代興亡事必拱手曰當如是不當如
彼皇太子每斂容嘉納言必稱師父云

宋濂傳

天順二年四月乙丑皇太子出閣講讀上語廷臣曰東宮
講讀宜在文華殿朕欲移居武英殿但早晚朝見太后不
便乃以左廊居東宮

昭代典則

成化十八年十二月文華殿大訓成書凡二十八卷列綱
四曰進學曰養德曰厚倫曰明治帝親製文弁其首命詹

明會要卷十四

九

事彭華中允周經等進講於太子太子每起立拱聽萬安
以爲勞謂講官宜請坐聽華與經不從竟得如禮

三編

宏治十一年三月己亥皇太子出閣讀講東宮宦豎不欲
太子近儒臣數以事間之詹事吳寬上疏曰東宮講學寒
暑風雨則止朔望令節則止一年不過數月一月不過數
日一日不過數刻是進講之時少輟講之時多豈容復以
他事妨之古人八歲就傅卽居宿於外欲令離近習親正
人庶民且然况太子天下本哉

吳寬傳

十五年尙書馬文升奏皇太子當進學之時雖日出讀書
正在左春坊與二三內閣翰林等官相接且去處頗狹未

甚從容古者帝王之教太子左右前後罔非正人是以教諭而德成臣愚請皇太子照皇上御經筵故事每月三次初六十六二十六出御文華殿令六部都察院諸卿掌印官同內閣大臣東宮講讀等官侍班讀書庶皇太子收斂身心相接日久自然識見益廣疏入帝不納

明臣奏議

嘉靖二十五年皇太子生十一年猶未出閣講學御史周冕極言諭教不可緩請早降綸音慎選侍從帝怒謫雲南典史

周冕傳

萬厯二十年正月給事中李獻可偕六科諸臣疏請豫教言元子年十有一矣豫教之典當及首春舉行儻謂內廷

明會要卷十四

十

足可誦讀近侍亦堪輔導則禁闈幽閒豈若外朝之清肅內臣忠敬何如師保之尊嚴

李獻可傳

二十二年皇長子常洛出閣講學時已十四歲帝手諭閣臣令議出閣講學禮儀兵部請護衛工部奏儀仗禮部進儀注皆留中令止豫告奉先殿朝謁兩宮他禮皆廢給事中張貞觀等言禮官議御門受賀皇長子見羣臣之禮載在舊儀卽諸王加冠亦以成禮而賀賀畢謁見元子初出乃不當諸王一冠乎且謁謝止兩宮而缺然於陛下及中宮母妃之前非所以教孝賀斬於二皇子而漠然於兄弟長幼之間非所以序別疏入忤旨奪俸一年

張貞觀傳

三十七年二月大學士葉向高請令東宮講學時東宮輟講者五年廷臣屢請不得命至是向高擇吉以請亦不報自是歲春秋必懇請帝不納向高傳

四十四年皇太子輟講已十有二年羣臣諫疏凡數百上及是始命舉行以詹事府劉一燝等為講讀官皇太子進執事諸臣及賜酒饌皆稱先生進對進做敏妙合法中外大悅然一講而輟後不復更舉矣三編

崇禎十一年二月太子出閣十五年正月開講閣臣條上講儀七月改慈慶宮為端本宮慈慶懿安皇后所居也時太子年十四議明歲選婚故先為置宮而移懿安后於仁

明實錄卷十四

壽殿諸王傳

冠禮

太子皇孫年十二或十五始冠天子自為主擇三公太常為賓贊凡三加冠一祝醴成化間始定祝詞醮詞勒戒詞其諸王冠祝醮詞皆洪武間定會典

洪武元年定皇太子冠禮通典始加折上巾再加遠遊冠三

加九旒冕陸錢病逸漫記

二十六年定親王冠禮會典

永樂九年十一月立皇長子瞻基為皇太孫冠於華蓋殿

冕服如皇太子玉圭如親王三編

景泰四年二月乙未皇太子冠大政記

成化十四年三月續定皇太子冠禮初加翼善冠再加皮

弁三加冕旒會典甲子皇太子冠大政記

二十三年更定親王冠禮會典

宏治九年三月乙亥皇太子冠大政記

嘉靖二十四年穆宗在東宮方十歲欲行冠禮大學士嚴

嵩尙書費宋初皆難之後遂阿旨以爲可行而請稍簡煩

儀止取成禮帝以冠當具禮至二十八年始行之禮志

三十一年三月癸未朔裕王景王行冠禮賓自致祝不用

宣祝官會典

明會典卷十四

十一

隆慶元年十一月定東宮加冠儀注宏孝殿神霄殿亦當預告

萬厯三年正月帝擇日長髮命禮部具儀張居正等言禮

重冠婚皇上前在東宮已行冠禮三加彌尊執爵而酌巨

禮旣成可略其細不必命部臣擬議第先期至奉先殿宏

孝殿神霄殿以長髮告禮畢詣兩宮皇太后行五拜三叩

頭禮隨御乾清宮受賀帝是之遂著爲令通典

二十四年禮部奏皇長子出閣在邇合先行冠禮以見講

官但尙未册立旣不可遽用東宮之儀又不可下同親王

之服姑令暫著常服出講以待册立之日再行冠禮如勅

奉行禮科給事中楊天民奏皇長子已及十有五歲加冠
選婚正當其候乞諭禮部擇吉具儀及時并舉則於大典

有光典

二十九年禮部尙書馮琦言舊制皇太子冠設冠席醴席
於文華殿內今文華殿爲皇上臨御遣官之地則皇太子
冠醴席應移於殿之東序又親王冠舊設席於皇極門之
東廡今皇太子移席於殿東序則親王應移席於殿西序
從之禮志

天啟元年正月上行冠禮科臣成明樞爲規以獻通紀

品官冠禮始加緇布冠再加進賢冠三加爵弁會典

明會要卷十四

七

婚禮

洪武元年令民間婚娶並依朱子家禮又令男女婚姻各
以其時或有指腹割衫襟爲親者並行禁止會典

十二月定皇太子親王士庶婚禮大政記

五年詔曰古之婚禮結兩姓之歡以重人倫近世以來專
論聘財習染奢侈宜令中書省集議定制頒行務從節儉
以厚風俗違者論罪如律會典

十七年十二月翰林院待詔朱善上疏論昏媾律曰民間
姑舅及兩姨子女法不得爲婚仇家詆訟或已聘見絕或
旣婚復離甚至兒女成行有司逼奪按舊律尊長卑幼相

與爲婚者有禁蓋謂母之姊妹與己之身是爲姑舅兩姨不可以卑幼上匹尊屬若姑舅兩姨子女無尊卑之嫌成周時王朝相與爲婚者不過齊宋陳杞故稱異姓大國曰伯舅小國曰叔舅列國齊宋魯秦晉亦各自爲甥舅之國後世晉王謝唐崔盧潘楊之睦朱陳之好皆世爲婚媾溫嶠以舅子娶姑女呂榮公夫人張氏卽其母申國夫人姊女古人如此甚多願下羣臣議弛其禁從之

朱善傳

二十六年正月重定諸王公主婚禮

大政記

永樂十四年四月定皇太孫婚禮儀仗如親王降皇太子

一等而用象輅

同上

明會要卷十四

古

深澤知縣王源勸民及時嫁娶革其爭財之俗

王源傳

明興諸帝卽位後行冊立禮正統七年英宗大婚始定儀

注禮志

天順八年憲宗卽位有司以遺詔請大婚南京吏部侍郎章綸言山陵尙新元朔未改百日從吉心甯自安陛下踐阼之初當以孝治天下三綱五常實原於此乞俟來春舉行議雖不從天下咸重其言

章綸傳

成化十八年十一月禁諸王府不得與親屬爲婚

大政記

正德元年七月帝將大婚詔取太倉銀四十萬兩御史趙佑言左右以婚禮爲名將肆無厭之欲計臣懼禍而不敢

阻閣臣避怨而不敢爭用如泥沙坐致耗國韓文亦連疏

請命減四之一

趙佑傳

嘉靖元年九月乙巳以大婚期近遣徐元祚告天地郭勛告太廟刑部尙書林俊上言今日之最急者惟取法祖宗躬行節儉茲大婚屆期六禮之儀固不可缺中外賞犒爲費尤多時絀舉贏其何能濟願一切罷省崇節儉以爲天下先詔褒納之

實錄

舊制立后謁內廟而已嘉靖十三年正月立皇后方氏下禮臣議廟見禮於是羣臣議以天子立三宮以承宗廟禮經有廟見之文乃考據禮經參稽大明集禮擬儀注以上

明會要卷十四

五

至期帝率后謁太廟及世廟

同上

三十二年正月詔裕王景王出邸同日婚禮部尙書歐陽德以裕王儲貳不當出外疏言曩太祖以父婚子諸王皆處禁中宣宗孝宗以兄婚弟始出外府今事與太祖同請從初制帝不許德又言會典醮詞主器則曰承宗分藩則曰承家今裕王當何從帝不悅然終諒其誠婚亦竟不同

日歐陽德傳

萬厯六年帝大婚屆期以居正充納采問名副使吉服從事給事中李涑言大婚重典而使居正變服從吉駭觀聽不宜乞別簡用不聽

三編

十年議准宗室奏選正配仍奏請封號俟有成命方許成婚若成婚在未封之先者謂之擅婚所生之子止許請名不許請封

王圻通考

又議准宗室子女年十五以上奏行本境內官軍軍民之字及居官入籍年久者選擇婚配雖係重結王親亦必服屬無礙方准題請授封成婚

同上

二十四年四月以諸皇子婚詔取太倉銀二千四百萬兩戶部告匱命嚴覈天下積儲

本紀

鄉飲酒禮

洪武初詔中書省詳定鄉飲酒禮使民歲時宴會習禮讀

明會要卷十四

六

律期於申明朝廷之法敦敘長幼之節遂為定制

五年四月戊戌詔天下行鄉飲酒禮每歲孟春孟冬有司與學官率士大夫之老者行於學校民間里社以百家為一會或糧長里長主之年最長者為正賓餘以齒序每季行之讀律令則以刑部所編申明戒諭書兼讀之武職於每月朔日以大都督府所編戒諭書率僚佐讀之

已上會典

是年魏觀出知蘇州府聘耆民周壽誼楊茂林文友行鄉

飲酒禮

魏觀傳

十四年二月申明鄉飲酒禮

大政記

十六年頒行鄉飲酒禮圖式其儀以府州縣長吏為主以

鄉之致仕官有德行者爲僕擇年高有德者爲賓其次爲介又其次爲三賓又其次爲眾賓教職爲司正贊禮贊引讀律皆使能者會典

十八年重定鄉飲酒禮敘長幼論賢良別姦頑異罪人其坐席間高年有德者居於上高年純篤者居於次餘以齒序其有曾違條犯令之人列於外坐同類者成席不許雜於善良之中同上

二十二年定鄉飲酒禮以善惡分列三等爲坐次不許混淆如有不遵序坐及有過之人不赴飲者以違制論通典

禁踰侈

明皇卷十四

洪武元年十二月諭中書省臣曰帝王之治天下必定禮制以辨貴賤明等威是以漢高初興卽有衣錦繡綺縠操兵乘馬之禁歷代皆然近代風俗相沿流於奢侈閭里之民服食居處與公卿無異貴賤無等僭禮敗度此元之所以失也宜明立禁條頒示中外俾各有所守以正名分聖政記

三年八月己卯申禁官民器服僭用大政

十八年九月庚午諭戶部曰足食在於禁末作足衣在於禁華靡宜申明天下四民各守其業不許游食庶民之家

不許衣錦繡大訓記

二十六年六月辛丑申嚴公侯制度僭侈之禁大政記

三十年八月上御奉天殿見散騎舍人衣極鮮麗問制用

幾何對曰五百貫上曰五百貫農夫十數口之家一歲之

資也爾乃費之於一衣豈非暴殄命切責之昭代典則

宣德四年二月乙未諭行在禮部尙書胡濙曰朝廷之禮

最先正名尊卑等級不可僭差凡內外官員士庶服飾儀

從皆有定制近多越禮犯分其揭榜申明定章使無僭越

大訓記

成化六年十二月禁奢侈從給事中王宏請也大政記

宏治十一年十二月庚子禁中外奢靡踰制

明會要卷十四

六

正德元年六月辛酉禁吏民奢靡十四年二月丁未禁冠

服非制

嘉靖九年二月丁丑禁官民服舍器用踰制

十四年二月丁未禁冠服非制已上本紀

二十四年閏正月詔中外嚴禁奢靡大政記

二十七年四月給事中奏請申明禮制凡飲食宴會服舍

輿馬器用之類悉差爲等第令不得踰越憲章錄

萬曆十五年六月戊辰禁廷臣奢僭本紀沈鯉爲禮部尙書

念時俗侈靡稽先朝典制自喪祭冠婚宮室器服率定爲

中制頒天下沈鯉傳

崇禎十六年十月十六日勅朕浣衣減膳已有諭旨今用錫木磁器以示儉約其金銀各器係關典禮者留用餘貯庫以備賞賚內外文武諸臣俱宜省約賊平之後照舊春

錄

旌表

明初凡有孝行節義由各地方申報風憲官覈實奏聞卽與旌表其後止許布衣編民委巷婦女得以名聞其有官職及科目出身者不與焉會典

洪武二十七年九月命禮部定旌表例時日照民江伯兒以母病殺其三歲子祀岱嶽有司以孝聞帝怒其滅絕倫

明會要卷十四

九

理杖百戍海南因命禮部定旌表孝行事例尙書任亨泰議曰人子事親居則致其敬養則致其樂有事則謹其醫藥臥冰割股事非恆經割股不已至於割肝割肝不已至於殺子違道傷生莫此爲甚墮宗絕祀尤不孝之大者宜嚴行戒諭儻愚昧無知亦聽其所爲不在旌表之例詔曰

可任亨
泰傳

徐宗實爲蘇州通判請旌元節婦王氏禮部以前朝事不

當允宗實言武王封比干墓獨非前朝事乎遂得旌徐宗實傳

宣德元年五月總旗衛整女母病篤割肝煮液母飲之而愈禮部特爲請旌帝曰孝親有道剖腹割肝豈可爲孝若

因此傷生其罪益大女子無知不必加罪所請不允

大訓記

明會要卷十四

三

明會要卷十四終

明會要卷十五

永新龍文彬纂

禮十賓

優禮元裔

洪武三年封密迪哩巴拉舊作買地里八喇為崇禮侯諾曰昔帝

王之有天下必封前代子孫使作賓王家其來尙矣元失

其馭四海紛爭朕削平羣雄混一區宇為天下主而密迪

哩巴拉為元之宗孫比者遣將北征爾祖已歿既克應昌

爾迺來歸朕念帝王之後爰稽古制錫以侯封稱朕優禮

之意尋賜第龍光山聖政記七年九月上謂廷臣曰草木無

明會要卷十五

心遇春而茂遇秋而零氣之所感猶知榮悴况於人乎崇

禮侯密迪哩巴拉南來已五載今已長成豈無父母鄉土

之思宜遣之還於是厚禮而歸之通典

蕃王來朝

洪武二年九月壬子定蕃王蕃使朝貢禮昭代典則

二十七年四月更定蕃國朝貢儀大政記

永樂六年八月淳泥國王麻那惹加那帥妃及弟妹子女

陪臣泛海來朝次福建遣中官往迎勞所過州縣皆宴比

至帝慰勞再三饗於奉天門妃以下饗於他所禮訖送入

會同館禮官請王見親王儀帝令準公侯禮

九年滿刺加國王拜里迷蘇喇帥妻子陪臣五百四十餘人來朝有司供張會同館入朝奉天殿帝親宴之妃以下宴他所光祿日致牲牢上尊賜賞甚厚及歸賜宴奉天門禮官餞於龍江驛復賜宴龍潭驛十七年王子母幹撒于的兒沙率妻子陪臣來朝謝恩

十年九月淳泥國王遐旺偕其母來朝命禮官宴之會同館光祿寺旦暮給酒饌明日帝饗之奉天門王母亦有宴越二日再宴

十五年西洋蘇祿國東王西王崗王帥其家屬頭目凡三百四十餘人浮海來朝比辭歸東王次德州卒於館帝遣

明會要卷十五
二

官營葬賜諡曰恭定

十八年八月古麻喇朗國王幹義亦奔敦帥妻子陪臣來朝還至福建卒諡曰康靖葬以王禮

宣德八年滿刺加王西里麻哈刺率妻子陪臣來朝抵南京天已寒命俟春和北上別遣人齎勅勞賜王及妃及入

朝宴賚如禮已上外國傳及通典

遣使之蕃

明祖既定天下分遣使者奉詔書往諭諸國或降香幣以

祀其國之山川禮志

洪武二年命侍讀學士張以甯等往封陳日烱為安南國

王以甯抵安南境日燿先卒其姪日燿嗣立迎請誥印以甯不與諭日燿請命於朝以甯駐安南俟命教世子服三年喪令其國人效中國行頓首稽首禮帝聞而嘉之賜璽書比之陸賈馬援安南與占城搆兵帝命編修羅復仁等諭令罷兵兩國皆奉詔

外國傳張以甯傳

十二年二月定遣使外國儀注

集禮

宣德六年禮部侍郎章敞使安南命黎利權國事利遣人白相見禮敞曰汝敬使者所以尊朝廷奚白爲利聽命趨拜下坐噉以聲色不爲動還致厚贐不受利以付貢使及關悉閱貢物封其贐付關吏

章敞傳

明會要卷十五

三

行人侯璉使交趾關門卑前驅偃而入璉叱曰此狗竇耳奈何辱天使交人爲毀關乃入及歸饋遺無所受

侯璉傳

景泰元年六月以給事中李實爲禮部侍郎大理寺丞羅綺爲少卿令齎敕書諭衛拉特君臣遂偕阿喇使俱往

三編

七月遣右都御史楊善等使衛拉特

同上

成化四年遣太監鄭同崔安使朝鮮遼東巡按御史侯英奏同等所過驛騷狀因言同安俱朝鮮人見其國王不免屈節褻中國體乞寢成命或翰林或給事中行人內推選一員往使爲便帝然之自後賞賜遣內臣冊封正副使選

廷臣有學者充

朝鮮傳

安南多寶貨使者率從水道挾估客往以爲利交人頗輕之宏治元年侍講劉戩頒詔安南由南甯乘傳抵其國交人大驚戩依舊制受陪臣拜謁不交一語越宿卽行饋遺一無所受使人要於塗固致之卒麾去章敞傳

嘉靖十八年時當頒詔朝鮮帝以安南事未決欲因以往

覘命擇大臣有學識者以往乃起黃綰禮部尙書兼翰林學士爲正使諭德張治副之黃綰傳

隆慶時給事中魏時亮使朝鮮故事王北面聽詔使者西面時亮力爭乃南面宣詔時亮傳

蕃使入貢

明會要卷十五

四

洪武二年六月安南國王陳日燿遣使奉表來朝貢方物帝喜賜宴

八月高麗國王王顥遣使修貢請封命符璽郎僕斯齋詔及金印往封之

十二月阿答阿者遣使奉表貢象虎方物命中書省管句甘桓等往封爲占城國王並賜綵幣頒大統厯

四年占城入貢言安南侵擾因求兵器帝命禮部諭之曰占城安南同奉正朔乃擅自構兵妄害生靈旣失事君之禮又乖交鄰之道已咨安南國王令卽日罷兵王亦宜講信修睦各保疆土所請兵器於王何吝但兩國互構而賜

占城是助王相攻甚非撫安之義

是年日本遣僧祖來奉表稱臣貢方物太祖嘉之宴賚其

使者

已上外國傳

五年二月安南陳叔明遣使入貢

時弒其主日燈而自立

主客曹已

受表曾魯取副封視之白尙書詰使者前王日燈今何驟更名使者不敢諱具言其實帝曰烏夷乃狡獪如此耶卻

其貢

曾魯傳

七年諭中書及禮部臣曰古諸侯於天子比年一小聘三年一大聘九州之外則每世一朝所貢方物表誠敬而已惟高麗頗知禮樂故令三年一貢他遠國如占城安南西

明會要卷十五

五

洋瑣里瓜哇淳泥三佛齊暹羅斛真臘諸國入貢既頻勞費太甚今不必復爾其移牒諸國俾知之

呂宋瑣里諸國來貢帝謂中書省臣曰西洋諸國素稱遠番涉海而來難計歲月無論疏數厚往而薄來可也

高麗貢使失風洪師範等二十九人溺焉帝憫之謂中書省曰高麗貢獻繁數既困敝其民而涉海復虞覆溺宜遵古諸侯之禮三年一聘貢物惟所產毋過侈其明諭朕意十二年高麗貢黃金百斤白銀萬兩以不如約卻之十三年日本遣使來貢無表卻之

十七年高麗遣使貢馬二千匹言金非地所產願以馬代

輸餘皆如約許之尋以高麗既聽命宜損其貢數令三年

一朝貢馬五十匹

已上外國傳

二十六年定凡四夷歸化人員及朝貢使客初至會同館主客部官隨即至彼點視正從一切處分安妥仍加撫綏使知朝廷恩澤

會典

二十七年安南遣使由廣東入貢帝怒遣官詰責卻其貢承樂元年日本入貢禮部尙書李至剛奏故事番使入中國不得私攜兵器鬻民宜敕所司覈其船諸犯禁者悉籍送京師帝曰外夷脩貢履險蹈危有所鬻以助資斧豈可概拘以禁令至其兵器亦準時直市之毋阻其向化心

明會要卷十五

六

西洋瑣里刺泥諸國來貢因攜胡椒與民市有司請徵其稅帝曰徵稅以抑逐末之民豈以爲利今遠人慕義來乃取其貨所得幾何虧損國體多矣其勿徵

已上外國傳

七年威喇特遣使貢馬請封遂封嗎哈穆特爲順甯王太平爲賢義王巴圖博囉爲安樂王

三編

九年九月朝鮮使臣將歸例有賜賚禮部尙書趙玘不以奏帝怒曰是且使朕失遠人心遂下之獄

外國傳

阿魯台復來貢馬因請得役屬吐番諸部求朝廷刻金作誓磨其金酒中飲諸酋長以盟眾議欲許之因黃淮言乃

止

黃淮傳

十三年正月丁未馬哈木等貢馬謝罪且還前所留使詞甚卑順帝曰衛拉特故不足與較受其獻館其使者外國傳

宣德末古里蘇門答刺等十一國貢使久留京師未遣正統元年閏六月命與瓜哇使臣同行敕瓜哇國王加意撫

郵分遣還國同上

七年十一月衛拉特額森遣使入貢故事衛拉特使止三十餘人其後利朝廷賞賚所遣動以千計大同供應費至三十餘萬是春帝以貢使太多限三百人入關及秋至大同者復二千餘人以馬易弓藏於衣篋不可勝計巡撫羅亨信請於居庸關詰檢之不許郭敬歲造箭鏃數十饗遺

明實錄卷十五

其使帝亦不問三編

正統十四年十月衛拉特托克托布哈遣使入貢帝從胡濙王直議厚賞賜以間之同上

天順五年保喇遣使來貢受約又請改大同舊貢道由陝

西蘭縣入許之河套之患始此保喇舊作孛來

成化三年正月朝鮮頻貢異物海青白鶻之屬敕國王李孫脩常貢勿事珍奇

四年夏日本遣使貢馬謝恩禮之如制十一月復遣使臣清啟入貢其從者殺人於市有司請治罪清啟奏請帶回本國如法論治且自服不能鈐束之罪上命俱赦之自是

使者益無忌

六年四月申諸番三歲入貢之例多不過百五十人由四川雅州入國師以下不許貢於是貢使漸稀

十七年九月暹羅貢使還至中途竊買子女且多載私鹽命遣官戒諭諸番

已上外國傳

十九年十月西番賽瑪爾堪

舊作撒馬兒罕

等國共貢獅子奏請

大臣往迎職方郎中陸容言此無用之物在郊廟不可爲

犧牲在乘輿不可備驂服宜勿受用洪謨亦言往迎非禮

帝卒遣中使往迎之

通紀

宏治元年六月小王子遣使千五百餘人款關求通貢巡

明會要卷十五

八

撫許進以便宜納之聞於朝所上書自稱大元汗朝廷方

務優容許遣五百人詣京師

三編

十一月土魯番阿哈瑪特遣使入貢稱與哈尙締媾乞賜

蟒袍及九龍渾金膝襪諸物使至甘州哈密都指揮阿穆

呼朗告變朝廷亦不罪番使但令還諭其主反侵地阿哈

瑪特竟不奉命復遣使來貢禮官議薄其賞而拘其使臣

外國傳及三編

二年十二月賽瑪爾堪由廣東貢獅子鸚鵡等物禮部尙

書耿裕等言南海非西域貢道請卻勿受禮科給事中韓

鼎等亦言狎獠之獸狎玩非宜且騷擾道路供費不貲不

可受從之外國傳

五年九月西域呼喇濟舊作火刺扎國回回布魯完舊作帕魯灣等

由海貢玻瓈瑪瑙諸物帝不納賜道里費遣還西域傳

舊設南北兩會同館接待番夷使客遇有貢夷到京主客

司員外郎主事輪赴會同館點視方物譏防出入宏治五

年各夷來貢者眾添設提督會同館主事一員會典

六年土魯番貢使留京師頗有宣召禮部尙書耿裕等言

番人不道因朝貢許其自新彼復潛稱可汗興兵犯順陛

下優假其使適遇倔強之時彼將謂天朝畏之益長桀驁

帝卽遣其使還耿裕傳

明會要卷十五

嘉靖二年禮官言諸國使臣在途者遷延隔歲在京者伺

候同賞光祿郵傳供億不貲宜示以期約因列上禁制數

事從之西域傳

三年魯迷國貢獅子西牛西狗西馬及珠玉諸物給事中

鄭一鵬引漢閉玉門關謝西域故事請敕邊臣量行賞賚

遣還國以彰不寶遠物之德不聽鄭一鵬傳

七年六月土魯番求通貢乞歸羈留使臣提督三邊都御

史王瓊再疏請詔還番使通貢如故王瓊傳

十二年賽瑪爾堪偕天方土魯番入貢稱王者至百餘人

禮官夏言等言土魯番十五王天方二十七王賽瑪爾堪

五十三王實前此所未有宏治間回賜敕書止稱一王若循賽瑪爾堪往歲故事類答王號人與一敕非所以尊中國制外蕃也帝納其言國止給一敕且加詰讓示以國無二王之義

十五年甘肅巡撫趙載奏諸國稱王者至一百五十餘人皆非本朝封爵宜令改正且定貢使名數通事宜用漢人毋專用色目人致交通生釁部議從之

已上西域傳

十八年日本貢使至甯波守臣以聞時不通貢者已十七年敕巡按御史督同三司官覈實果誠心效順如制遣送否則卻回且嚴居民交通之禁

外國傳

明會要卷十五

十

二十六年三月甘肅巡撫楊博言西域入貢人多宜爲限制禮官言祖宗故事惟哈密每年入貢貢使三百人送十一赴京餘留關內有司供給他若哈烈哈三土魯番天方賽瑪爾堪諸國道經哈密者或三年五年一貢止送三五十人其存留賞賚如哈密例宜敕邊臣恪遵制可

西域傳

二十七年日本周良復求貢巡撫朱紘以聞禮部言日本貢期及人與船數雖違制第表辭恭順若概加拒絕則航海之勞可憫若稍務含容則宗設素卿之事可鑑宜敕紘起送五十人餘留嘉賓館量加犒賞諭令歸國報可

外國傳

三十九年朝鮮國陪臣到京命禮部尙書待又泰甯等夷

人頭目命總督戎政勳臣待自後夷使至京以此爲例典

隆慶四年十一月諳達遣使乞封貢

三編

通典論曰謹按漢時呼韓邪單于入覲蕭望之謂單于非正朔所加宜待以不臣之禮後代蕃使朝貢儀注率多優假皆本於望之之議明初定蕃使入朝宣制撫問國君并及使者略如敵國之儀此亦沿習歷代具文而揆諸大一統之朝所以駕馭蕃服者其說固未當也夫普天率土莫非王臣要荒之裔以職事來朝正宜示以彝憲俾知共主之尊義在則然卽頑梗不率之風因之盡戢彼望之之議特以威德不能及遠聊爲權宜之計耳後儒無識遂至承訛襲謬豈知帝王撫臨中外予以拊循尤當明其體制若概以敵國待之轉致取輕殊俗於恩威並用之道甯有當哉

明會要卷十六

永新龍文彬纂

禮十一軍禮

親征

洪武元年閏七月詔定軍禮中書省會儒臣議親征遣將

禮奏之大政記

永樂八年二月帝自將征衛拉特舊作瓦刺五月大敗韃靼於

鄂諾河舊作斡難河布尼雅實哩舊作木雅失里遁遂征阿嚕台六月

擊阿嚕台敗之

十二年二月詔親征衛喇特六月至和拉和錫袞舊作忽蘭忽失

明會要卷十一

溫大破衛拉特兵追至圖拉河舊作土刺河嗎哈穆特舊作馬哈木

遁

二十年三月帝自將征阿嚕台七月帝至沙璉原阿嚕台

遁遂征烏梁海舊作兀良哈

二十一年七月帝復自將征阿嚕台七月至上莊堡蒙古

額森托噶舊作也先土干來降

二十二年正月復詔北征六月前鋒至達蘭納穆爾舊作答蘭

納木兒河不見敵命張輔等窮搜三百里無所得帝進駐河

上以糧盡引還已上三編

宣德元年八月漢王高煦反帝親征至樂安高煦出降

三年七月帝自將巡邊敗烏梁海濟勒默特之眾於寬河
已上本紀

正統十四年七月衛拉特分道入寇太監王振挾帝親征
兵部尙書鄺埜侍郎于謙力言六師不宜輕出不聽吏部
尙書王直率廷臣力諫曰敵勢猖獗陛下但宜固守封疆
申號令堅壁清野蓄銳以待之可圖必勝不必親御六師
遠臨塞下况秋暑未退旱氣未回青草不豐水泉猶塞土
馬之用未充兵凶戰危臣等以為不可不從三編刑科給事
中曹凱言今日之勢大異澶淵彼文武忠勇士馬勁悍今
中貴竊權人心玩懈此輩不惟以陛下為孤注即懷愍徽

明會要卷十六

二

欽亦何暇恤皆不納曹凱傳

正德十四年八月帝自將擊宸濠禮部上祭告儀注如舊
帝令祭祀俱遣官代及疏請遣官有制勿遣其頒詔亦如

舊制禮志

閱武

洪武六年三月戊申大閱
二十年二月壬午閱武

永樂八年二月北征大閱

十二年二月己酉大閱四月甲辰朔次興和大閱

二十年四月乙卯次雲州大閱五月丁卯大閱壬申大閱

二十一年八月己酉大閱

宣德四年十月甲午閱武於近郊已上本紀

正統十一年十月上閱武於近郊實錄

天順四年十月甲子閱京營將領騎射於西苑十一月丁

酉閱隨操武臣騎射於西苑本紀

成化元年二月簡閱團營將士大政記

九年四月壬午閱武臣騎射於西苑十一月丁酉復閱騎

射於西苑本紀

隆慶三年九月辛卯大閱武於教場上戎服登壇分別將

領及侯伯錦衣中射等第賞罰有差大閱久不行至是以

明會要卷十六

三

為曠典百官稱賀明書

萬厯九年三月丙寅大閱準隆慶三年例行也同上

崇禎十年八月車駕閱城鎧甲旌旗甚盛羣臣悉鸞帶策

馬從六軍望見乘輿皆呼萬歲帝大悅召尙書入御幄酌

以金卮然徒為容觀而已兵志

附閱馬

嘉靖十二年三月上幸南苑環碧殿閱馬馬有玉麟飛白

玉驄照夜碧銀河練瑤池駿飛白凡七召輔臣入賜茗飲

嘉隆間見紀是日大朝畢上暫退更便服於殿外丹陛上設幄

羣臣侍班御馬監之馬雲錦成羣壯士控之由東過西最

爲盛觀嘉靖以後久不舉行崇禎五年冬至郊祀明日百官入賀朝畢復一閱視是日閱馬三百三十三匹

春明夢餘錄

遣將

洪武中命大將儀上服武弁服御午門百僚盛服陪大將軍拜前諸將拜後先授節次授鉞訖出勒所部建牙鳴鼓角正行列擊節鉞鼓吹前導百官以次送出

弇山堂別集

建文元年六月命李景隆爲征虜大將軍將兵五十萬北

伐賜通天犀帶帝親推轂餞之江滸

李景隆傳

永樂四年七月命朱能張輔等討安南上親餞之龍江

朱能傳

明會要卷十六

四

天啟元年六月起熊廷弼經略遼東七月廷弼陸辭特賜

麒麟服一彩幣四宴之郊外令文武大臣陪餞異數也

廷弼傳

二年八月命孫承宗督師經略薊遼賜上方劍御門臨遣

閣臣送之崇文門外

承宗傳

崇禎十二年八月特旨命楊嗣昌督師討賊賜尙方劍九

月朔召見平臺嗣昌條七事以獻四日復召見賜宴手觴

三爵御製贈行詩一章嗣昌跪誦拜且泣越二日陸辭賜

膳嗣昌傳

十七年正月庚子輔臣李建泰自請督師勦賊上大喜慰

勞再三曰卿若行朕當仿古推轂禮遂加建泰兵部尙書
賜尙方劍便宜從事乙卯行遣將禮以特牲告太廟帝御
正陽門樓衛士東西列自午門抵城外旌旗甲仗甚盛內
閣五府六部都察院掌印官及京營文武大臣侍立鴻臚
贊禮御史糾儀賜之宴御席居中諸臣陪侍酒七行帝手
金卮親酌建泰者三乃出手敕曰代朕親征宴畢內臣爲
披紅簪花用鼓樂導尙方劍而出建泰頓首謝且辭行帝
目逆之

建泰傳

勞軍

丙午正月張士誠軍遮海口吳良大敗之太祖詣江陰勞

明會要卷十六

五

軍周巡壁壘嘆曰良今之吳起也

吳良傳

洪武二年兩廣旣平廖永忠還京師帝命太子帥百官迎

勞於龍江

永忠傳

三年十一月徐達振旅還京師帝迎勞於龍江

徐達傳

永樂八年七月車駕次開平宴勞軍士

三編

崇禎十二年二月曹變蛟從洪承疇入衛帝遣使迎勞將

士各有賜

曹變蛟傳

受俘

凡凱還皇帝率諸將陳凱樂俘馘於廟社門外告畢以俘
馘付刑部協律郎導樂以退其告祭禮儀與出師同

會典

洪武三年六月壬申李文忠捷奏至癸酉密迪哩巴拉至京師羣臣請獻俘帝曰武王伐殷用之乎省臣以唐太宗常行之對帝曰是待王世充耳若遇隋之子孫恐不爾也

遂不許

紀本

四年傅友德平四川送明昇等至京禮臣請帝御殿受俘如孟昶降宋故事帝曰昇幼弱事由臣下與昶異宜免其伏地待罪之儀授爵歸義侯

二編

永樂四年定獻俘前期兵部官以露布奏聞禮部告示文武百官具朝服并坊廂里老人等行慶賀

禮會典

五年九月乙卯御奉天門受安南俘大賚將士

明會要卷十六

六

十二年三月癸未張輔俘陳季擴于老撾以獻交阯平

十八年三月甲申山東都指揮僉事衛青敗賊於安邱指揮王眞敗賊於諸城獻俘京師

正統九年二月丙午王驥擊走思機發俘其孥以獻

景泰二年四月乙酉梁瑤王來等破平越苗獻俘京師

紀本

紀本

正德十五年閏八月癸巳上在南京受江西俘上欲自以

爲捷命設廣場戎服樹大纛環以諸軍令釋逆濠等去桎梏伐鼓鳴金而禽之然後置械行獻俘禮

三編

嘉靖二十三年十月叛賊王三屢導吉囊入犯大同官軍

計擒之遣官祭南北郊景神殿太社稷擇日獻俘百官表

賀禮志

隆慶四年十二月丁酉諳達執叛人趙全等九人來獻乙

卯受俘本紀禮部奏是日文武百官具朝服詣午門前行慶

賀禮會典

萬厯二十年十一月戊辰御午門受甯夏俘

二十七年四月甲戌御午門受倭俘

二十八年十二月乙未御午門受播州俘已上本紀

天啟二年四川獻逆犯樊友邦等山東獻逆犯徐鴻儒等

俱遣官告祭郊廟御樓獻俘禮志

明會要卷十六

七

田獵

永樂十年十月戊辰獵城南武岡

十三年十月甲申獵於近郊

二十年五月乙丑獵於偏嶺

宣德四年十月乙未獵於峪口

五年十月己卯獵於埜道

九年九月丙戌獵於埜道丁酉至洗馬林閱城堡兵備已

亥大獵已上本紀

正統十年十月丙午獵南海子大政記

天順二年十月甲子獵南海子

正德十二年正月己丑大祀天地於南郊遂獵於南海子
十三年正月庚戌大祀天地於南郊遂獵於南海子已上本紀

兵祭

癸卯七月癸丑太祖自將救洪都禡牙於龍江大政記

洪武元年始定親征遣將諸禮儀以爲古者天子親征則類于上帝造于祖宜于社禡于所征之地祭所過山川若遣將出師亦告於廟社禡祭旗纛而後行於是諸儒議定旗纛之祭每歲仲秋祭山川日遣官祭於旗纛廟霜降日又祭於教場至歲暮享太廟日又祭於承天門外俱旗手

衛指揮行禮會典

明會要卷十六

十二月庚寅立旗纛廟大政記

國有大征討皇帝禡祭祭軍牙之神六纛之神飲福受胙望燎刺五雄雞血於五酒椀酌神焉吾學編

凡親征儀祭告天地宗廟社稷禡祭旗纛所過山川皆行

祭告師遣奏凱獻俘於廟社以露布詔告天下王圻通考

凡類于上帝前期擇日祭告天地皇帝服武弁服乘革輅

備六軍作樂行三獻之禮造于太廟宜于上帝同同上

永樂四年七月辛卯命朱能等征安南癸卯禡祭出師

神旗之祭祭火雷之神每月朔望神機營提督官請祭於

教場會典

八年二月以親征被於承天門遣官祭太歲旗纛等神八月丁未遣官祭旗纛

大政記

嘉靖十八年南巡遣官祭旗纛之神用牲醴制帛三獻如常儀

大射

洪武三年五月丁未詔行大射禮定制凡郊廟祭祀先期行之命工部製射侯定以七鵠天子虎鵠皇太子熊鵠親王豹鵠文武一品同三品至五品糝鵠六品至九品狐鵠文武子弟及士民俊秀皆布鵠采自五采以下有差布鵠無采其司正司射等官皆仿古射禮增損用之上又以先

明會要卷十六

九

王射禮久廢弧矢之事專習於武夫而文士多未解詔國學及郡縣生員皆習射頒大射儀於天下朔望則於公廡或閒地習之

春明夢餘錄

二十五年令遇朔望習射於射圃樹鵠置位初三十步累加至九十步每耦二人各挾四矢以次相繼長官主射射畢中的飲三爵中采二爵

會典

永樂十一年五月五日幸東苑擊毬射柳聽文武羣臣四夷朝使及在京耆老聚觀分擊毬官爲兩朋自皇太孫而下諸王大臣以次擊射賜中者幣帛有差

通典

明會要卷十六終

明會要卷十七

永新龍文彬纂

禮十二禮凶

山陵

祖陵

熙祖陵在鳳陽府泗州墳城北洪武初薦號曰祖陵後號其山曰基運

皇陵

仁祖陵在鳳陽府太平鄉洪武二年薦號曰英陵尋改稱皇陵後號其山曰翊聖

孝陵

太祖陵在南京鍾山之陽後號其山曰神烈

長陵

成祖陵在京畿之昌平州永樂七年封其山曰天壽以後諸陵皆在天壽山

獻陵

仁宗陵在天壽山西峯下

景陵

宣宗陵在天壽山東峯下距長陵東北一里許

明會要卷十七

裕陵

英宗陵在石門山距顯陵西三里自顯陵碑前分西為裕陵神路

景帝陵

在山金

茂陵

憲宗陵在昌平州聚寶山東少南

泰陵

孝宗陵在昌平州筆架山東南

康陵

武宗陵在昌平州金嶺山東北

永陵

世宗陵在昌平州陽翠嶺

昭陵

穆宗陵在昌平州大峪山東北

定陵

神宗陵在昌平州大峪山距昭陵北一里自昭陵五空橋東二百步分北為定陵

慶陵

光宗陵在天壽山西峯右

德陵

熹宗陵在昌平州雙瑣山檀子峪西南距永陵一里

思陵莊烈帝陵在田
貴妃寢園內

丙午四月丁卯太祖至濠州念祖考葬時禮有未備乃詢改葬典禮服制於許存仁等皆以儀禮改葬總對時有言發祥之地靈秀所鍾不宜啟遷以洩山川之氣太祖然之乃命增土培其封置守冢二十家大政記

太祖卽位設祖陵祠祭署置奉祀一員陵戶二百九十三設皇陵衛并祠祭署奉祀一員祀丞三員陵戶三千三百

四十二禮志

四年建祖陵廟仿唐宋同堂異室之制同上

十一年四月命脩葺皇陵詔曰皇堂新造予時秉鑑窺形

明會要卷十七

二

但見蒼顏皓首忽思往日之艱辛竊恐前此碑記出自儒臣粉飾之文不足以爲後世子孫戒特述艱難以明昌運乃自製碑文命江陰侯吳良督工刻之大訓記

十九年八月甲辰命皇太子修泗洲盱眙祖陵又詔禮部製帝后冕服命太子詣陵寢行葬衣冠祭告禮大政記

二十六年令車馬過陵及守陵官民入陵者百步外下馬違者以大不敬論禮志

三十一年太祖崩遺詔喪祭儀物毋用金玉孝陵山川因其故勿改作本紀

永樂元年工部以泗州祖陵黑瓦爲言帝命易以黃如皇

陵制禮志

十一年營壽陵於昌平既成帝車駕臨視名曰長陵封其山曰天壽遂以徐皇后葬焉三編

宣宗卽位方脩獻陵帝欲遵遺詔從儉約以問蹇義夏原

吉二人力贊曰聖見高遠出於至孝萬世之利也帝親爲

規畫三月而陵成宏麗不及長陵其後諸帝因以爲制迨

世宗營永陵始益崇侈云蹇義傳

英宗卽位罷山陵夫役萬七千人紀本

正統二年諭天壽山陵寢翦伐樹木者重罪都察院榜禁

錦衣衛官校巡視工部欽天監官環山立界禮志

明會要卷十七

三

天順元年毀景帝所營壽陵以親王禮葬西山至成化十一年敕有司繕陵寢祭饗視諸陵景帝紀

成化四年慈懿太后崩詔議山陵大學士彭時及商輅劉

定之言合葬裕陵主祔廟此不易之理皇上所以遲疑者

以今皇太后萬壽後當與先帝同尊自嫌二后並配非祖

宗制考之於古漢文帝尊所生母薄太后而呂后仍祔長

陵宋仁宗追尊生母李宸妃而劉后仍祔太廟今若陵廟

之制稍有未合則有乖前美貽譏來葉帝復猶豫時偕朝

臣伏文華門泣請帝與太后皆感動始從時議彭時傳

鳳陽皇陵所在近境取寸木法皆死陵軍多倚禁虐民巡

按何鑑請以山麓爲限他樵採勿禁遂著爲令

何鑑傳

慈懿雖合葬裕陵而異隧距英宗元堂數丈許室之虛右壙以待隧獨通宏治十七年周太后崩孝宗御便殿出裕陵圖示大學士曰陵有二隧一室一通此皆先朝內臣所爲未合禮昨見成化時彭時商輅等章奏先朝大臣忠厚爲國如此先帝亦甚不得已耳因與劉健等議欲通隧欽天監奏恐動地脈乃止

錢皇
后傳

孝宗崩工部言大行遺詔惓惓以節用愛民爲本乞敕內府諸司凡葬儀冥器并山陵殿宇務從簡省

禮志

正德元年給事中周璽奏中官李興王瑞營造先帝陵寢

明會要卷十七

四

砍伐禁山樹木數萬株掘取禁山石片數百丈損傷龍脈驚犯陵寢新甯伯譚祐工部侍郎李璉奉命提督知情故縱罪俱難追伏覩英宗諭旨於天壽山偷砍樹木該管軍衛人等不行鈐束罪該處死憲宗諭旨於鳳陽等處應禁山場伐樹取石正犯處死宏治中南京守備太監蔣忠於孝陵南二十餘里案山開路私便行走事發論死此列聖杜漸防微之深意今興等所盜非一木一石比陛下止令充淨軍罪重罰輕未厭眾心乞將興瑞照例處死祐璉亟加貶黜以全國法以安陵寢疏入帝不納

明臣
奏議

十三年二月丙戌傳旨以大行太皇太后山陵將開隧道

朕欲輕騎往視啟土工畢徧祭諸陵楊廷和毛澄等言山陵之役祖宗列聖以來付之有司雖梓宮發引送之不踰禁闕其爲慮也深矣伏望勉從家法以安人心科道朱鳴陽等言梓宮在殯陛下於視朝聽政猶且不允輕騎遠出豈禮所宜且吉凶異禮喪祭異宜陛下欲徧祀諸陵不知服從吉乎抑以凶乎以衰經之哀慘行俎豆之雍容尤不可之甚者也不報

嘉靖元年十二月命廷臣議擇壽安皇太后葬地時文武大臣皆言椽子嶺地形高敞可以卜葬而上意欲附近茂陵命興工擇日楊廷和等言宋甯宗欲耐孝宗於裕思諸

明會要卷十七

五

陵之旁朱熹累疏謂祖塋之制不宜數興工作驚動神靈今欲耐壽安皇太后於茂陵左右將開金井興大工在天之靈恐有未安且其襟抱疎洩利害非細請如原議不納

已上
實錄

四年畿民盜天壽山陵樹巡按楊紹芳引盜大祀神御物律斬都御史王廷相言大祀神御物者指神御在內祭器帷帳之物而言律文盜陵木者止杖一百徒三年今舍本律非法之平

廷相
傳

十四年三月上親詣諸陵閱視語郭勛曰景陵規制獨小又多損壞其於我宣宗皇帝功德之大殊爲弗稱當重建

宮殿增崇基構以隆追報

憲章錄

十五年十月遷孝肅孝穆孝惠三后神主於陵殿禮官言奉慈殿之祀其稱皇太后太皇太后者乃子孫所上尊號今已遷奉於陵則宜從夫婦之義改題孝肅神主不用睿字孝穆孝惠不用純字則嫡庶有別矣從之

十七年改陵殿曰祫恩殿門曰祫恩門又建成祖聖蹟亭於平臺山率從官行祭禮

已上禮志

二十七年二月作永陵時大行皇后將葬上以陵名未定下禮官議於是尙書費采言太祖葬孝慈皇后於孝陵成祖葬仁孝皇后於長陵皆命名在先卜葬在後載實錄中

明會要卷十七

六

上乃自定孝烈皇后陵曰永陵

隆慶元年奉安世宗梓宮乃自天壽山西南襖兒峪遷孝潔皇后梓宮合葬孝恪皇后亦自金山遷祔焉

已上會典

自仁宗獻陵以後規制儉約世宗葬永陵其制始侈及神宗葬定陵給事中惠世揚御史薛貞巡視陵工費至八百

餘萬云

禮志

萬厯十三年八月作壽宮於大峪山命禮部侍郎朱賡往視中官示帝意欲倣永陵制賡言昭陵在望制過之非所安疏入久不下已竟如其言

朱賡傳

閏九月帝以李植言壽

宮有石數十丈恐寶座將置石上癸卯復躬往天壽山閱

視之終謂大峪吉遂謫植及江東之羊可立於外

李植傳

是年禮科都給事中萬象春疏國家之事莫大於祀典祀典之起實由於人心洪惟太祖開基建文君嗣統既緣靖難兵至避位自焚迄今祭享無聞陵園不治行道之人歔歔嘆息臣嘗考往牒當建文君沒成祖駐營龍江發哀命有司治喪葬以天子之禮遣官致祭當其時固未嘗不陵不祭也乃今令甲所載止孝陵及懿文太子陵而建文君不與焉國家脩明典禮凡前代帝王有功德於民者除歲時廟祭外間遣官祀於其陵矧君臨天下四五年爲嗣統之正者乎又如革除死事諸臣我皇上登極之初首發明

明皇叢卷十七

七

詔令得祀於其鄉邇又允言官之奏凡諸臣墳墓苗裔咸蒙脩治卹錄而爲之君者反不得一抔之土一勺之水宜天下人心惋然而深悲也似宜勅下所司卽其原葬處所立爲陵廟歲時一體祭祀仍乞上尊諡以表追報之隆復年號以正君臨之體至景皇帝值土木之變奉太后命進登寶位克戡禍亂迨升遐之日諡號祭葬率從貶損實非人心之公國典之正也憲宗純皇帝允廷臣議復其帝號祭以帝禮然而廟號未加陵制有儉於國制終屬缺典似宜遵照典制備加尊諡仍恭上廟號昭示無疆其陵制隘陋尤須亟爲恢改以慰人心企望之殷以垂一代經常之

則帝不允

明臣奏議

顯陵

獻皇帝陵在承天府鍾祥縣東十里松林山

後號純德山

嘉靖

三年葺陵廟薦號曰顯陵司香內官言陵制狹小請改營

視天壽山諸陵工部尙書趙璜言陵制與山水相稱難概

同帝納其言

趙璜傳

九月錦衣百戶隨全光祿錄事錢子勳

旣以罪褫希旨請獻帝顯陵改葬天壽山事下工部璜以

爲改葬不可者三皇考體魄所安不可輕犯一也山川靈

秀所萃不可輕洩二也國家根本所在不可輕動三也昔

太祖不遷皇陵太宗不遷孝陵願以爲法不敢輕議上命

明會要卷十七

八

禮官集議

明政統宗

十月禮部尙書席書會廷臣集議上言顯

陵先帝體魄所藏不可輕動昔高皇帝不遷祖陵文皇帝

不遷孝陵全等詔諛小人妄論山陵宜下法司按問報曰

先帝陵寢在遠朕朝夕思念其再詳議以聞書復集眾議

極言不可乃已

席書傳

十七年十二月癸卯章聖太后崩先是上營壽陵於大峪

山將奉獻皇帝改葬焉至是諭禮部曰茲事重大不可緩

其遣重臣於大峪山營造顯陵一面南奉皇考梓宮來山

合葬丁未命崔元張瓚等爲奉迎禮儀使壬子上詣大峪

山相視山陵直隸巡按御史陳讓上言合葬之舉出自陛

下誠孝之一心然臣聞葬者藏也欲令不得見也今出皇考體魄於所藏之地竊非所宜昔黃帝衣冠之陵在陝西者曰橋陵舜葬九疑二女不從古人事死之禮先廟而後墳重魂而後魄臣以爲宜奉睿宗遺衣冠與章聖皇太后合葬於大峪山又以章聖皇太后遺冠帔奉以合葬於顯陵如此則體魄不動陟降有歸仁之至義之盡也疏入上責其阻撓成命黜爲民已而上自大峪山還己未諭輔臣曰遷陵一事朕中夜思之皇考奉藏體魄將二十年一旦啟露於風塵之下撼搖於道路之遠朕心不安卽皇考亦必不安聖母尤大不甯也今欲決以禮之正莫如奉慈宮

明會要卷十七

九

南詣合葬穴中令禮臣再議以聞實錄嚴嵩等言靈駕北來

慈宮南詣共一舉耳宜如初議上意終不決因止崔元等

且勿行而令指揮趙俊南往啟視幽宮明年俊自承天還

言顯陵不吉上欲親詣承天周閱卜兆九卿大臣許讚呂

相等皆諫上曰朕豈空行哉爲吾母耳三月庚辰至承天

謁顯陵作新宮曰待合葬也四月戊申歸過慶都堯母墓

從臣請致祭帝曰帝堯父母異陵可知合葬非古旣至京

復詣大峪審視曰大峪不如純德遂定南祔之議閏五月

庚申葬獻皇后於顯陵

三編

太子陵寢

懿文太子陵在孝陵左四孟清明中元冬至歲暮及忌辰

凡九祭禮志

舊例以祠祭司官代萬厯中太常少卿謝杰言祝版署御名而遣賤者將事於禮為褻請如哀沖莊敬二太子例遣列侯帝是之乃用南京五府僉書謝杰傳

嘉靖二十八年命莊敬太子哀沖太子並建寢園歲時祭

祀從諸陵後會典

親諸陵

洪武八年四月辛卯上如中都謁皇陵

建文元年三月清明節親祭孝陵已上大政記

明實錄卷十七

十

四年六月己巳燕王謁孝陵本紀

永樂元年五月丙戌以太祖忌日謁祭孝陵大政記

二年五月己酉錦衣衛奏明日上謁孝陵請具法駕上曰

不用但以騎士數人前導已而命前導騎士亦不可用王圻

通考

七年二月戊子謁鳳陽皇陵

十一年三月辛未車駕次鳳陽謁皇陵

十四年十月丁丑次鳳陽祀皇陵癸未至自北京謁孝陵

洪熙元年四月壬子命皇太子謁孝陵戊午如天壽山謁

長陵

宣德元年二月丙戌謁長陵獻陵

已上本紀

五年二月乙未奉太后謁二陵帝親橐鞬騎導太后輦至清河橋下馬扶輦畿民夾道拜觀陵旁老穉皆山呼迎拜

太后顧曰百姓戴君以能安之耳皇帝宜重念

三編

正統七年二月庚申謁天壽山陵

本紀

十年三月甲戌朔謁天壽山三陵令百官具淺色衣服如

洪武永樂例又定制每歲三月謁祭以為常

禮志

十一年三月癸酉如天壽山謁陵

十二年三月癸亥如天壽山謁陵

已上本紀

十三年二月乙酉如天壽山謁陵

大政記

明會要卷十七

正德十三年四月己巳朔謁六陵

本紀

嘉靖十五年三月丙子奉章聖皇太后如天壽山謁陵癸

未謁恭讓章皇后景皇帝陵

本紀

至沙河見居民蕭條顧謂李時曰七陵在此宜加守護時對曰昔邱濬建議京師當

設四輔以臨清為南昌平為北薊州保定為東西各屯兵

一二萬今若於昌平增一總兵可南衛京師北護陵寢帝

乃下廷臣勘議於沙河築鞏華城為置戍焉

李時傳

四月癸卯以建山陵親詣七陵行祭告禮九月庚午如天

壽山謁陵

十六年三月癸酉奉章聖太后如天壽山謁陵

十七年三月戊辰謁天壽山陵九月乙未如天壽山行秋祭禮

十八年三月辛巳謁顯陵十月乙丑朔躬祭長陵

隆慶二年二月丁未如天壽山謁長陵永陵

萬厯八年三月辛亥奉兩宮皇太后謁陵

十一年二月乙丑如天壽山謁九陵庚午如西山謁恭讓

章皇后景皇帝陵九月甲申如天壽山謁陵

十二年九月丙戌奉兩宮皇太后如天壽山謁陵已上本紀

遣官祭陵

吳元年四月仁祖忌日太祖詣太廟祭畢命太子及諸王

明會要卷十七

七

往鳳陽展奠皇陵

王圻通考

洪武元年三月遣官祭仁祖陵

大政記

八年十月詔翰林院議陵廟朔望節序祭祀禮學士樂韶

鳳等言舊儀每歲元旦清明七月望十月朔冬夏至日俱

用太牢遣官致祭其伏臘社每月朔望則用特羊祠祭署

官行禮如節與朔望伏臘社同日則用節禮從之

王圻通考

建文初定孝陵每歲正旦孟冬忌辰聖節俱行香清明中

元冬至俱祭祀勳舊大臣行禮文武官陪祀

會典

宣宗卽位遣鄭王瞻埃往南京祭孝陵

大政記

宏治中南京司禮太監陳祖圭言魏國公徐備每祭孝陵

皆由紅券門直入至殿內行禮僭妄宜改備言入由紅券門者所以重祖宗之祭尊皇上之命出由小旁門者所以守臣下之分循守故事幾及百年豈敢擅易下禮部議言長陵及太廟遣官致祭所由之門與孝陵事體相同宜如

舊從之

禮志

正德間定長陵以下諸陵凡清明中元冬至俱分遣駙馬都尉行禮文武官陪祭忌辰及正旦孟冬聖節亦遣駙馬都尉行禮

同上

嘉靖十四年二月帝諭夏言清明節既遣官上陵內殿復祭似涉煩瀆言因言我朝以清明中元冬至凡三上陵中

明會要卷十七

三

元俗節事本不經冬至既行大報配天之禮則陵事爲輕請罷冬至上陵而移中元於霜降惟清明如故仍輟二節內殿之祭從之

通典

萬厯四十四年八月南京太常寺少卿桂有根言孝陵元旦清明長至三大祭文物俱備中元孟冬兩忌辰及萬壽節五祭向止陳設酒果應加牲帛祝文從之

三編

從葬

孝陵四十妃嬪惟二妃葬孝陵之東西餘俱從葬

長陵十六妃俱從葬

獻陵七妃三葬金山餘俱從葬

已上會典

正統元年八月追贈皇庶母惠妃何氏爲貴妃諡端靜趙氏爲賢妃諡純靜吳氏爲惠妃諡貞順焦氏爲淑妃諡莊靜曹氏爲敬妃諡莊順徐氏爲順妃諡貞惠袁氏爲麗妃諡恭定諸氏爲淑妃諡貞靜李氏爲充妃諡恭順何氏爲成妃諡肅僖册文曰茲委身而蹈義隨龍馭以上賓宜薦徽稱用彰節行蓋宣宗殉葬宮妃也

后妃傳

天順八年英宗崩遺詔罷宮妃殉葬初太祖崩宮人多從死者歷成祖仁宣二宗皆用殉葬多者至數十人景泰帝以郕王薨猶用其制至是遺詔罷之

三編

陵災

明會要卷十七

古

宏治元年五月丙子南京震雷壞孝陵御道樹

六年十二月壬戌南京大雷雨拔孝陵樹七年六月癸酉如之

十五年六七月南京大風雨孝陵神宮監及懿文陵樹木多摧敗者

正德元年六月丙子南京暴風雨雷震孝陵白土岡樹

十三年八月庚辰獻陵明樓災

已上五行志

萬厯二年七月霖雨昭陵地陷

三編

二十三年九月淮水溢浸泗州祖陵

同上

三十年十月丙申孝陵災

三十一年五月戊寅鳳陽皇陵雨雹

三十二年五月癸酉雷燬長陵樓六月丁酉昌平大水壞

各陵橋道

三十三年五月丙申鳳陽大風雨損皇陵正殿御座

四十六年九月壬子茂陵火已上五行志

崇禎八年正月丙寅賊陷鳳陽燔皇陵變聞於朝帝素服

避殿三編

忌辰

太祖五月十日 孝慈皇后八月十日

成祖七月十八日 仁孝皇后七月四日

明會要卷十七

五

仁宗五月十二日 誠孝皇后十月十八日

宣宗正月三日 孝恭皇后九月四日

英宗正月十七日 孝莊皇后六月二十六日 孝肅皇

后三月一日 已上春明夢餘錄

嘉靖元年奏準二月十九日景皇帝忌辰十一月五日恭

讓章皇后忌辰穿青紵絲會典

憲宗八月二日 孝貞皇后二月十日 孝穆皇后六月

二十八日 孝惠皇后十一月十八日

孝宗五月七日 孝康皇后八月八日

武宗三月十四日 孝靜皇后正月二十五日

世宗十二月十四日 孝潔皇后十月二日 孝烈皇后

十月十八日 孝恪皇后正月十一日

穆宗五月二十六日 孝懿皇后四月十三日 孝安皇

后七月十三日 孝定皇后二月九日

神宗七月二十一日 孝端皇后四月六日 孝靖皇后

九月十三日

光宗九月一日 孝元皇后十二月二十四日 孝和皇

后三月一日 孝純皇后七月十九日

熹宗八月二十二日 已上春明
夢餘錄

明制凡值帝后忌辰遣官祭陵止用香燭酒果無帛 讀禮
通考

明會要卷十七

洪武八年四月乙巳仁祖忌日親詣皇陵致祭辛亥仁皇

后忌辰躬詣陵祭 大政
記

永樂元年禮官具奏五月初十日為太祖高皇帝忌辰自

初八至初十日不鳴鐘鼓不行賞罰不舉音樂禁屠宰文

武官自初八日服淺淡衣黑角帶侍朝至日早赴孝陵行

禮八月初十日孝慈高皇后忌辰禮亦如之 實錄

二年五月丙戌高皇帝忌辰上騎從祭陵不用法駕 大政
記

宣德三年令凡遇忌辰通政司禮科兵馬司免引囚奏事

五年敕瀆皇帝后忌日官員朝參輟奏事高皇帝后文皇

帝后昭皇帝忌辰悉輟朝參

正統三年正月初三日恭遇章皇帝忌辰令升殿朝參如

常儀

已上會典

宏治十年八月癸卯吏部尙書馬文升言臣伏聞宣德間有旨仁祖忌辰諸司悉免奏事自太祖至仁宗生忌俱輟朝一日其後不知始於何時仁祖忌辰照常奏事唯太祖至憲宗忌辰百官淺淡服黑角帶朝廷亦出視朝鳴鐘鼓奏事與古禮未合又與宣宗敕旨有違臣竊思之自仁祖至憲宗世有遠近服有隆殺臣愚欲自仁祖忌辰至英宗生忌日照舊視朝鳴鐘鼓奏事若遇憲宗紀太后忌日皇上於奉先等殿祭祀畢回宮不出視朝著淺淡服進素膳淵默以居不預他事或如宣宗聖旨自太祖至憲宗生忌照例俱輟朝一日上令禮部詳議禮部言文升所奏不爲無見但奉有先朝事例迄今見行不敢更易伏乞聖明裁處上曰列聖忌辰已有旨淺淡服色視事

十四年令遇忌辰朝參官不許服紵絲紗羅景皇帝恭讓

皇后忌辰遇節令服青綠花樣宣宗忌辰遇祭祀服紅

會典

嘉靖元年五月仁宗忌辰遣官祭獻陵先是給事中安磐等奏稱是日適值經筵衣緋賜宴輟講則廢學如儀則忘孝請移經筵前一日帝下其議禮部覆言經筵禮儀日期累朝未之有改考之祭義曰君子有終身之喪忌日之謂

也此專指父母而言祖父以上經禮未載伏聞孝宗在位
遇憲宗忌辰仍御經筵凡侍班等官俱衣青綠花樣賜宴
宜倣此行帝特旨暫免

二年八月丁未萬壽聖節先是再遇聖節皆以先帝喪殺
禮又值高皇后忌辰移之先一日至是禮官言大喪既除
宜盡從吉典先忌祭而後受朝亦不妨同日上可其同日
之請猶以孝惠皇太后制未除不忍純吉仍暫免習儀宣
表及雞唱山呼之禮是日帝親祀奉先殿奉慈殿孝惠皇
太后几筵殿畢出御奉先殿受賀免文武百官及四夷使

臣宴賞

已上
實錄

明會要卷十七

六

十八年五月定列聖忌祭儀舊制俱在奉先殿行禮徧祭
列聖上以爲非禮更定高皇帝后忌辰祭於景神殿列聖
帝后祭於永思殿

大政
記

二十四年令遇忌辰仍於奉先殿致祭

隆慶元年題准凡遇忌辰文武百官不問內外班行謝恩
見辭俱淺淡服色烏紗帽黑角帶不許用公服

萬厯四年定凡郊廟奏祭祀日遇有忌辰則移前一日如
致齋日內遇忌辰上具常服百官具青綠錦繡其正祭日
遇忌者如祭在日間臨時仍具祭服行禮本日祭之前後

與致齋遇忌同

已上
會典

明會要卷十七終

明會要卷十七

九

